

禮記通解

禮記通解卷十七

郝敬習

經解第二十六

經解解釋六經學者之得失也。次節以後與經無涉。文義亦不屬。

孔子曰。入其國其教可知也。其爲人也。溫柔敦厚。詩教也。疏通知遠。書教也。廣博易良。樂教也。絜靜精微。易教也。恭儉莊敬。禮教也。屬辭比事。春秋教也。故詩之失愚。書之失誣。樂之失奢。易之失賊。禮之失煩。春秋之失亂。其爲人也。溫柔敦厚而不愚。則深於詩者也。疏通知遠。

而不誣則深於書者也。廣博易良而不奢則深於樂者也。絜靜精微而不賊則深於易者也。恭儉莊敬而不煩則深於禮者也。屬辭比事而不亂則深於春秋者也。

此所謂六經之教皆以資習合道者論之。聖人教民以詩要使人溫柔敦厚而已。其人苟溫柔敦厚卽是詩教。若徒學詩不得其義過于溫厚則明辨不足而失之愚。疏通知遠謂明達往古治亂之理書之教也。若徒學書不得其義過于旁通則多聞無實而失之誣。廣博易良者寬和不迫之意樂之教也。學樂不得其義過于放縱則侈肆無度而失之奢。絜靜精微謂

神化性命遠離糟粕易之教也學易不得其義涉于
隱怪則挾術任數而失之賊恭儉莊敬禮之教也學
禮不得其義過于撙節則委瑣重複而失之煩連屬
其辭約言以示褒貶比合其事設例以較異同是春
秋之教也學春秋不得其義過于裁斷則妄事譏評
居下訕上而失之亂學通六經無此六失于聖人立
教之義得之深矣

按六經之訓至矣何失之有自大道隱而六籍廢書
缺過半諸禮皆後儒補綴惟易詩春秋三經稱完璧
焉今六十四卦三百篇具在何賊何愚之有漢伏生

所授尚書纔十九篇而秦漢之際僞書襍行今文古文千餘年來未有能辨其真贋者誣則誠有之要非書之舊也禮樂原不分二經春秋親切簡當聖人之意藹如遭諸傳割裂附會賞人罰人亂自後儒始仲尼無比辭屬事之文春秋無長亂之失皆後儒之咎耳六經自夫子裁定夫子又自爲此評乎謬可知也天子者與天地參故德配天地兼利萬物與日月并明明照四海而不遺微小其在朝廷則道仁聖禮義之序燕處則聽雅頌之音行步則有環佩之聲升車則有鸞和之音居處有禮進退有度百官得其宜萬事得其序

詩云。淑人君子。其儀不忒。其儀不忒。正是四國。此之謂也。發號出令。而民說謂之和。上下相親。謂之仁。民不求其所欲而得之。謂之信。除去天地之害。謂之義。義與信和。與仁霸王之器也。有治民之意。而無其器。則不成。禮之於正國也。猶衡之於輕重也。繩墨之於曲直也。規矩之於方圓也。故衡誠縣。不可欺。以輕重。繩墨誠陳。不可欺。以曲直。規矩誠設。不可欺。以方圓。君子審禮。不可誣。以姦詐。是故隆禮由禮。謂之有方之士。不隆禮。不由禮。謂之無方之民。敬讓之道也。故以奉宗廟。則敬。以入朝廷。則貴。賤有位。以處室家。則父子親。兄弟和。以處鄉里。

則長幼有序。孔子曰：安上治民，莫善於禮。此之謂也。

所謂天子者，德參天地，功利萬物，明并日月，朝廷臨御，則由仁聖禮義之序，燕處無事，則聽雅頌之音，心中斯須不和不樂，則鄙詐之私入之矣；故行步有環佩之聲，升車有鸞和之音，外貌斯須不莊不敬，則慢易之私入之矣。故居處有禮，進退有度，使官皆得其宜，事皆得其序，如此則道全德備，而表儀立，可以正。是四國矣。故發號施令而民說，上下相親，使民各得。其所欲，盡去其所害，所謂和仁信義，霸王之器也。和仁信義，所謂禮也。衡繩規矩，所謂器也。號令上下興。

利除害之類。所謂輕重曲直方圓之情也。器能成意。禮能正國。蓋莊敬恭儉立直方之體。則君德脩。品節制度爲防範之備。則治具張。雖有姦邪詐僞。焉能誣之。隆禮猶言尚禮。惟隆尚故能由視聽言動皆由禮也。有方猶言有道。禮有體謂之方。

故朝覲之禮所以明君臣之義也。聘問之禮所以使諸侯相尊敬也。喪祭之禮所以明臣子之恩也。鄉飲酒之禮所以明長幼之序也。昏姻之禮所以明男女之別也。夫禮禁亂之所由生。猶坊止水之所自來也。故以舊坊爲無所用而壞之者。必有水敗。以舊禮爲無所用而去

之者必有亂患故昏姻之禮廢則夫婦之道苦而淫辟之罪多矣鄉飲酒之禮廢則長幼之序失而爭鬪之獄繁矣喪祭之禮廢則臣子之恩薄而倍死忘生者衆矣聘覲之禮廢則君臣之位失諸侯之行惡而倍畔侵陵之敗起矣故禮之教化也微其止邪也於未形使人日徙善遠罪而不自知也是以先王隆之也易曰君子慎始差若毫釐繆以千里此之謂也

婦黨曰昏婿黨曰姻苦醜惡也釐釐通引易辭今易無之蓋諸家論易之言記者誤耳

經解終

哀公問第二十七

此章言禮主綱常本愛敬天人道合以成其身此約禮之至教也

哀公問於孔子曰大禮何如君子之言禮何其尊也孔子曰丘也小人不足以知禮君曰否吾子言之也孔子曰丘聞之民之所由生禮爲大非禮無以節事天地之神也非禮無以辨君臣上下長幼之位也非禮無以別男女父子兄弟之親昏姻疏數之交也君子以此之爲尊敬然句然後以其所能教百姓不廢其會節有成事然後治其雕鏤文章黼黻以嗣句其順之然後言其喪

筭備其鼎俎。設其豕腊。脩其宗廟。歲時以敬祭祀。句以
序宗族。句卽安其居。節醜其衣服。卑其宮室。車不雕幾。
器不刻鏤。食不貳味。以與民同利。昔之君子之行禮者。
如此。公曰。今之君子。胡莫之行也。孔子曰。今之君子。好
實無厭。淫德不倦。荒怠敖慢。固民是盡。午其衆。以伐有
道。求得當欲。不以其所。昔之用民者。由前。今之用民者。
由後。今之君子。莫爲禮也。

春秋世亂極矣。魯君弱。臣強。匡救之術。無踰于禮。故
夫子惓惓以禮告哀公。小人不足知。言知禮者之爲
大人也。禮莫大于事天地。郊社之事。各有節制。曰節。

事婦黨曰昏。壻黨曰姻。疏數猶言遲速。女二十有家。男三十有室。交配合也。尊敬然者。言君子于禮尊敬如此也。以其所能教百姓。非強以不能也。會謂行禮之際。節謂行禮之時。有成事謂會有定體。節有定期。以嗣謂繼續以行也。其順之謂教以可能而民順從也。卽安其居。隨所寓而安也。節醜。節損醜惡也。雕幾雕刻細微也。幾細也。好實好蓄積也。淫德行放蕩也。固如固獲之固。求取必得也。盡竭民財力也。午迂通一縱一橫曰午。交構之意。求得當。求滿額也不以其所不問理所在也。蓋禮本于恭儉。極于安民。得失在

幾微之間。有志于禮者。必躬行節儉。恣情淫欲者。必無心于禮。古今人所以不相及也。

孔子侍坐於哀公。哀公曰。敢問人道誰爲大。孔子愀然作色而對曰。君之及此言也。百姓之德也。固臣敢無辭而對。人道政爲大。公曰。敢問何謂爲政。孔子對曰。政者正也。君爲正。則百姓從政矣。君之所爲。百姓之所從也。君所不爲。百姓何從。公曰。敢問爲政如之何。孔子對曰。夫婦別。父子親。君臣嚴。三者正。則庶物從之矣。公曰。寡人雖無似也。願聞所以行三言之道。可得聞乎。孔子對曰。古之爲政。愛人爲大。所以治愛人。禮爲大。所以治

禮敬爲大敬之至矣大昏爲大大昏至矣大昏旣至冕而親迎親之也親之也者親之也是故君子興敬爲親舍敬是遺親也弗愛不親弗敬不正愛與敬其政之本與

愀然猶悄然悚惕貌百姓之德猶言百姓之幸固臣固陋之臣夫婦父子君臣人道之三綱也人道始于夫婦有夫婦然後有父子有父子然後有君臣故下文主昏姻言之無似猶言不肖似肖也愛人不以禮則爲私恩故治愛莫大于禮行禮不以敬則爲疏節故治禮莫切于敬禮以敬爲主敬以昏爲至昏者人

道之愛也。昏既爲敬之至，故雖天子諸侯昏，必冕服親迎，示躬親也。必躬親之者，示親愛也。興敬猶起敬，起敬所以爲親，舍敬是遺棄不親，何也不愛則疎而不親，不敬則褻而不正。愛敬之道始于夫婦，及于朝廷邦國，終于四海，不敢慢一人，不忍傷一物，舉而加之，故曰政之本也。

公曰：寡人願有言然。句冕而親迎，不已重乎？孔子愀然作色而對曰：合二姓之好，以繼先聖之後，以爲天地宗廟社稷之主，君何謂已重乎？公曰：寡人固。句不固焉得聞此言也？寡人欲問，不得其辭，請少進。孔子曰：天地不

合萬物不生大昏萬世之嗣也君何謂已重焉孔子遂
言曰內以治宗廟之禮足以配天地之神明出以治直
言之禮足以立上下之敬物恥足以振之國恥足以興
之爲政先禮禮其政之本與孔子遂言曰昔三代明王
之政必敬其妻子也有道妻也者親之主也敢不敬與
子也者親之後也敢不敬與君子無不敬也敬身爲大
身也者親之枝也敢不敬與不能敬其身是傷其親傷
其親是傷其本傷其本枝從而亡三者百姓之象也身
以及身子以及子妃配以及妃君行此三者則愼乎天
下矣大王之道也如此則國家順矣

願有言然者疑惑之辭先聖之後謂魯本周公之後
尊君而言也天地社稷兼天子諸侯而言固陋也不
固陋則夫子不以教故不得聞欲問不得其辭謂已
欲問而不能言也請少進請夫子更畧進教也治宗
廟之禮謂君供粢盛夫人供祭服也健順相承故配
天地之神明天曰神地曰明直言謂正名也名正故
言順物恥謂事物頽廢可恥惟禮足振拔之國恥謂
國勢微弱可恥惟禮足興起之冕而親迎夫所以敬
其妻冠于阼階父所以敬其子妻主內政奉宗廟故
曰親之主妻子身三者至近而易褻能敬則無所不

敬人皆有身與妻子。君能敬民皆做之。故曰百姓之
象也。敬吾身以及百姓之身。敬吾妻子以及百姓之
妻子。故曰繫乎天下。妃配同。懷作槃。大王猶言大則
以王。

公曰。敢問何謂敬身。孔子對曰。君子過言則民作辭。過
動則民作則。君子言不過辭。動不過則。百姓不命而敬
恭。如是則能敬其身。能敬其身則能成其親矣。公曰。敢
問何謂成親。孔子對曰。君子也者。人之成名也。百姓歸
之名。謂之君子之子。是使其親爲君子也。是爲成其親
之名也。已。孔子遂言曰。古之爲政。愛人爲大。不能愛人。

不能有其身。不能有其身。不能安土。不能安土。不能樂天。不能樂天。不能成其身。公曰。敢問何謂成身。孔子對曰。不過乎物。公曰。敢問君子何貴乎天道也。孔子對曰。貴其不已。如日月東西相從而不已也。是天道也不閉其久。是天道也。無爲而物成。是天道也。已成而明。是天道也。公曰。寡人蠢愚冥煩。子志之心也。孔子蹴然辟席而對曰。仁人不過乎物。孝子不過乎物。是故仁人之事親也如事天。事天如事親。是故孝子成身。公曰。寡人旣聞此言也。無如後罪。何。孔子對曰。君之及此言也。是臣之福也。

過言過動謂言動有過差作辭作則謂民皆效尤也
言動無過斯民不命而知敬恭所謂身以及身也能
立身則能揚名顯親故曰能成其親君子成德之名
謂德足以君國子民也子路問君子子曰君子脩己
以敬能敬其身百姓歸美謂此子爲君子子爲君子
則親爲君子之親是成親之名也愛敬者政之本不
能愛人人亦不愛之故不能有其身不能有其身則
不能隨寓順適而安土不能安土則不能隨時順理
而樂天斯俯仰無措不能成其身矣不過乎物謂有
物有則能不違則卽不過乎物性分以內還其本有

而無餘欠孟子謂仲尼不爲已甚卽不過乎物安土樂天之道也自此以上皆答哀公人道之問自此以下哀公因人道而問天道天人無二道成身則盡人盡人卽合天天道所以盛惟其不已不已故能久而成成而明人能自強不息動靜純乎天理如日月相從而不已是天道也通則運而有常閉則塞而不久困時制宜隨事化裁使民不倦故曰不閉其久不言而信不怒而威順理無心萬物受成故曰無爲而成君子能使已德成就功業昭明成已成人身以及身子以及子妃以及妃愛敬通乎天下故曰已成而明

皆不已之功。是天道也。冥煩謂氣昏冥。功煩難也。志之心求開示。使不忘也。蹴然斂足。改容之貌。仁人孝子。非有異術。惟及乎其物而止。物卽愛敬之物。仁人惟其能敬天。孝子惟其能愛親。天親雖二。愛敬則一。惟孝子爲能然。所以不過乎物。盡人道而成其爲身。天道不外此矣。此政之本也。無如後罪何。恐過物爲罪也。公言及此。蓋有意于寡過者。夫子所以慶幸之。○按道莫大于達天。以子貢之賢。自謂不得聞。而此篇與中庸于哀公詳言之。蓋臣之告君。不敢不盡。要其旨。唯不過乎物而止。語上不遺下教。所以兩端道。

所以一貫。愚不肖可知可能此也。故曰天高地下。萬物散殊。禮行乎其中。復禮則爲仁。禮者貫天人而爲言者也。

仲尼燕居第二十八

仲尼燕居。子張子貢言游侍。縱言至於禮。子曰。居。女三人者。吾語女禮。使女以禮周流。無不徧也。子貢越席而對曰。敢問何如。子曰。敬而不中禮。謂之野。恭而不中禮。謂之給。勇而不中禮。謂之逆。子曰。給奪慈仁。子曰。師爾過而商也不及。子產猶衆人之母也。能食之。不能教也。子貢越席而對曰。敢問將何以爲此中者也。子曰。禮乎禮。夫禮所以制中也。

縱言。謂汎言諸事。周流。無不徧。卽下文適中之意。敬主乎內。偏于敬。則外無文而失之野。恭見乎外。偏于

恭則內無實而失之給。給取利外也。勇而偏于勇。則狂悖而失之逆。三者野與逆。其失易見。恭而給者。似慈仁。故獨言給奪慈仁。蓋藥子張之病。外貌堂堂。惻怛慈愛之意少。所謂過也。子夏不及。所謂敬而不中。失之野也。子產一于慈仁。如乘輿濟人。婦人之仁。故曰衆人之母。能食而不能教。亦不及者也。子貢因問中道。夫子教以禮乎禮。猶云節之以禮也。慈仁不失于姑息。恭不失于給。敬不失于野。無過不及之弊。所以制中也。給奪慈仁以下。再云子曰者。少間更言。猶書誥屢云王若曰也。

子貢退言游進曰敢問禮也者領惡而全好者與子曰
然然則何如子曰郊社之義所以仁鬼神也嘗禘之禮
所以仁昭穆也饋奠之禮所以仁死喪也射鄉之禮所
以仁鄉黨也食饗之禮所以仁賓客也子曰明乎郊社
之義嘗禘之禮治國其如指諸掌而已乎是故以之居
處有禮故長幼辨也以之閨門之內有禮故三族和也
以之朝廷有禮故官爵序也以之田獵有禮故戎事閑
也以之軍旅有禮故武功成也是故宮室得其度句量
鼎得其象味得其時樂得其節車得其式鬼神得其饗
喪紀得其哀辨說得其黨官得其體政事得其施加於

身而錯於前凡衆之動得其宜

領提去也惡提而去之則純乎善矣猶所謂釋回增美也約之以禮則已克禮復而爲仁凡視聽言動之勿非者皆禮而郊社嘗禘五者爲禮之大凡視聽言動之復於禮者皆仁也而鬼神昭穆五者爲仁之大禮者仁之匡廓仁者禮之精神周決于其間者也天地百祀曰鬼神祖考子姓曰昭穆饋奠喪奠也始死以生事之故曰饋饋而不食故曰奠射射禮鄉鄉飲酒禮明于郊社之禮者事天如事親仁之至也明乎嘗禘之禮者事親如事天孝之至也孝敬之極通于

四海故曰治國如指掌。居處以下。推言禮之用無不宜。三族謂父子身。宮室以下。言以禮爲制。則各得其宜。宮室得度。不僭越也。量斗斛之類。鼎祭享之器。象者。古人成法。味得時。如春酸夏苦。秋辛冬鹹之類。樂得節。謂以禮則無淫聲。車得式。謂合六等之數。鬼神得饗。謂秩百神之祀。喪紀得哀。謂五服咸宜。辨說得黨。謂官府庫朝。敷奏詳明。各以其職。官得其體。謂不侵越。不曠廢政事。得其施。謂宜民情。合土俗。

子曰。禮者何也。卽事之治也。君子有其事。必有其治。治國而無禮。譬猶瞽之無相與俚俚。平其何之。譬如終

禮記集說 卷一百一十五
夜有求於幽室之中。非燭何見。若無禮則手足無所錯。耳目無所加。進退揖讓無所制。是故以之居處長幼失其別。閨門三族失其和。朝廷官爵失其序。田獵戎事失其策。軍旅武功失其制。宮室失其度。量鼎失其象。味失其時。樂失其節。車失其式。鬼神失其饗。喪紀失其哀。辨說失其黨。官失其體。政事失其施。加於身而錯於前。凡衆之動失其宜。如此則無以祖洽於衆也。

卽事之治。言事事不遺禮禮以治事。卽事之治是禮。此語最親切。俚俚無所適從。貌祖始也。洽合也。無祖謂無統宗。無洽謂不調和。

子曰慎聽之女三人者吾語女禮猶有九焉大饗有四
焉苟知此矣雖在猷畝之中事之句聖人已句兩君相
見揖讓而入門入門而縣興揖讓而升堂升堂而樂闋
缺下管象武夏箏序興陳其薦俎序其禮樂備其百官
如此而后君子知仁焉行中規還中矩和鸞中采齊客
出以雍徹以振羽是故君子無物而不在禮矣入門而
金作示情也升歌清廟示德也下而管象示事也是故
古之君子不必親相與言也以禮樂相示而已

大饗謂諸侯相饗之禮知此謂知此禮之義猷畝之
中無位者也事之謂事禮樂斯須不忘和敬聖人止

此矣。兩君相見，卽大饗。有九揖讓而入門，一也。入門而縣作，二也。縣，謂筦簫之懸，卽金屬。揖讓而升堂，三也。升堂而樂闋，四也。堂下以管奏象武之曲，五也。以簫奏大夏，次序而興，六也。陳其薦賓之俎，七也。序其禮樂之器數，八也。備其供事之百官，九也。皆所以仁賓客。故君子於此知仁，不徒識其節目而已也。行步周旋中規矩，在興和鸞中采齊，客出歌雍，徹燕振羽，所謂無物不在禮也。采齊，雍振羽，皆詩篇名。采齊，是茨也。振羽，振鷺也。君子無物不在禮，而其得于大饗者四：謂入門而縣興，揖讓而升堂，升堂而樂闋，堂下

管奏象與武此四者賓主相饗比禮比樂之會郊特
牲云賓入大門而奏肆夏示易以敬也卒爵而樂闋
孔子屢歎之奠酬而工升歌發德也歌者在上匏竹
在下貴人聲也卽大饗有四之義知此義者則無物
不在禮所謂畎畝聖人之事也九禮之中獨舉四事
餘五非獨大饗有也入門而金作三者申釋大饗四
禮以見禮非徒文耳金作卽縣興金卽懸也金聲和
鳴賓主初接鳴金以示情也樂工升堂歌清廟之詩
文王之德以彰賓主之美故曰示德歌工旣下以管
奏象維清之詩文王之典以勸賓主之功故曰示事

示言
卷二十一
四事舉三者升歌清廟卽揖讓升堂樂闋之時也古君子不言而相示以禮樂此禮樂所以爲仁賓客之至無物不在焉耳

按鄭註以主賓獻酬爲金再作湊合升歌清廟下管象爲四夫禮有三獻金當三作天子諸侯獻不止三作亦如之疏義附會恐未可據

子曰禮也者理也樂也者節也君子無理不動無節不作不能詩於禮繆不能樂於禮素薄於德於禮虛子曰制度在禮文爲在禮行之其在人乎子貢越席而對曰敢問夔其窮與子曰古之人與古之人也達於禮而不

達於樂謂之素達於樂而不達於禮謂之偏夫變達於樂而不達於禮是以傳於此名也古之人也子張問政子曰師乎前吾語女乎君子明於禮樂舉而錯之而已子張復問子曰師爾以爲必鋪几筵升降酌獻酬酢然後謂之禮乎爾以爲必行綴兆興羽籥作鐘鼓然後謂之樂乎言而履之禮也行而樂之樂也君子力此二者以南面而立夫是以天下大平也諸侯朝萬物服體而百官莫敢不承事矣禮之所興衆之所治也禮之所廢衆之所亂也目巧之室則有奧阼席則有上下車則有左右行則有隨立則有序古之義也室而無奧阼則亂

禮記正義
卷二
於堂室也。席而無上下則亂於席上也。車而無左右則
亂於車也。行而無隨則亂於塗也。立而無序則亂於位
也。昔聖帝明王諸侯辨貴賤長幼遠近男女外內莫敢
相踰越皆由此塗出也。三子者既得聞此言也。於夫子
句昭然若發矇矣。

無禮則無分辨。故禮所以爲理也。無樂則不和暢。故
樂所以爲節也。節和也。均也。無理不動。動必順理。無
節不作。作必應節。詩本和平。美刺可觀。禮之理也。不
興詩而求立禮。所執必差。而爲謬。樂本充盈。美善兼
盡。禮之節也。行禮不和。以樂過于嚴恪。而爲素。中和

德也。德主忠信。禮之實也。用禮不厚于德。外爲浮華而失之虛。故夫子曰。禮者。制度文爲也。而行之存乎其人。襲人名舜典樂之官。窮不達也。言但達樂不達禮。古之人與古之人也者。審稱之辭。猶論語云。君子人與。君子人也。傳於此名。謂傳此不達禮之名於後世。再言古之人。言不可輕議也。前吾語女。謂先已告汝。卽上文言禮樂也。目巧之室五者。言事物莫不有禮。目巧。謂不用繩墨規矩。但用目力相視爲巧。室隅有奧。尊者所居。堂階有阼。主人所歷。席有上下。如東向西向。以南爲上。南向北向。以東爲上之類。車有左

右謂尊者居左勇士居右五者猶上文卽事之治爲禮之意發矇目不見而忽開發也

按舜命夔典樂教胄子爲人倫師表豈不達禮而當九官之選與蓋所謂達樂者達其聲音律呂所謂不達禮者不達其升降度數之節若夫天常民彝不達何以爲夔如必詳于聲音度數然後爲達禮樂則叔孫通李延年賢于夔伯夷遠矣此節之義皆以明禮樂先後緩急猶論語興詩立禮成樂之意詩與樂皆所以調和禮者也故記樂于禮亦此意

仲尼燕居終

孔子閒居第二十九

先儒云退朝曰燕退燕曰閒燕居言禮閒居言詩

孔子閒居子夏侍子夏曰敢問詩云凱弟君子民之父母何如斯可謂民之父母矣孔子曰夫民之父母乎必達於禮樂之原以致五至而行三無以橫於天下四方有敗必先知之此之謂民之父母矣子夏曰民之父母旣得而聞之矣敢問何謂五至孔子曰志之所至詩亦至焉詩之所至禮亦至焉禮之所至樂亦至焉樂之所至哀亦至焉哀樂相生是故正明目而視之不可得而見也傾耳而聽之不可得而聞也志氣塞乎天地此之

謂五至子夏曰五至既得而聞之矣敢問何謂三無孔子曰無聲之樂無體之禮無服之喪此之謂三無子夏曰三無既得畧而聞之矣敢問何詩近之孔子曰夙夜其_恭命宥密無聲之樂也威儀逮逮不可選也無體之禮也凡民有喪匍匐救之無服之喪也

天高地下萬物散殊而禮行乎其中矣君子德參天地則能一體民物爲民父母故禮至父母斯民所謂大禮與天地同其盛者矣此章所言皆禮之大原故首舉父母之詩而終以天地無私三王之德也至者極盛不可加無者微妙不可見四方有敗必先知之

者謂父母一體。天地無私。有開必先。禮之神也。玉至謂志也。詩也。禮也。樂也。哀也。五者皆性情之秘。舉一兼五。起于志。終于哀。禮立乎其間。舒慘相生。始終相循。愛敬所以出。禮樂所以興。皆志氣充塞。神化變通。非聲容制度。歌咏哭泣之粗節。故曰至也。禮由心生。心所至爲志。好惡是也。志所宣揚卽詩。故曰詩亦至焉。詩有美刺。而善惡形。領惡全好。卽爲禮。故曰禮亦至焉。事得其禮。不亂則心安。其節而能和。故曰樂亦至焉。樂意舒暢。必生悲慘。禮弓云。人喜斯陶。以至于歎斯辟。故曰哀亦至焉。哀至又生樂。此皆人心變態。

氣幾默運微妙玄通非耳目見聞所及目正視則察
正傾聽則審正視不見傾聽不聞微之至也樂有聲
禮有體喪有服此其粗者聲于無聲體于無體服于
無服此其精者粗顯于有精妙于無夙夜基命宥密
周頌昊天有成命之詩言文王武王早夜憂勤肇基
天命于寬宥靜密之中無聲之樂也其當作基威儀
棣棣邇風柏舟之詩建建當作棣棣茂盛貌言威儀
無一非禮不可選擇不待冠裳會遇而後謂之行禮
無體之禮也凡民有喪邇風谷風之詩言鄰里有喪
皆急迫往救哀矜之誠不待五服衰麻而後謂之喪

也五至言道三無言德皆禮之本也

子夏曰言則大矣美矣盛矣言盡於此而已乎孔子曰
何爲其然也君子之服之也猶有五起焉子夏曰何如
孔子曰無聲之樂氣志不違無體之禮威儀遲遲無服
之喪內恕孔悲無聲之樂氣志旣得無體之禮威儀翼
翼無服之喪施及四國無聲之樂氣志旣從無體之禮
上下和同無服之喪以畜萬邦無聲之樂日聞四方無
體之禮日就月將無服之喪純德孔明無聲之樂氣志
旣起無體之禮施及四海無服之喪施于孫子

承上五至言道三無言德而此節五起又以進于德

合乎道也。服習也。起者上進之意。樂言氣志。樂本心生也。禮言威儀。禮由身體也。三無以次進于五而益純。故曰五起。氣志始于不達。至于既得。既得則人從人。從則聞四方。聞四方而後氣志之萌于微者。乃既起而樂作矣。威儀之始。矜持未熟。則遲遲。久則能敬。而翼翼。久則敬純而上下和同。久則日就月將而愈盛。久則篤恭天下平。而施及四海矣。無服之喪。其心平恕悲憫。進而惠及四國。又進而畜及萬邦。又進而純德昭于天下。又進而恩澤流于後世。如是而三無之德全體無虧。則五至之道冥合罔間矣。

子夏曰三王之德參於天地敢問何如斯可謂參於天
地矣孔子曰奉三無私以勞天下子夏曰敢問何謂三
無私孔子曰天無私覆地無私載日月無私照奉斯三
者以勞天下此之謂三無私其在詩曰帝命不違至於
湯齊湯降不遲聖敬日齊昭假遲遲上帝是祗帝命式
于九圍是湯之德也天有四時春夏秋冬風雨霜露無
非教也地載神氣神氣風霆風霆流形庶物露生無非
教也清明在躬志氣如神耆欲將至有開必先天降時
雨山川出雲其在詩曰嵩高維嶽峻極于天維嶽降神
生甫及申維申及甫爲周之翰四國于蕃四方于宣此

文武之德也。三代之王也。必先其令聞。詩云。明明天子。令聞不已。三代之德也。弛其文德。協此四國。大王之德也。子夏蹶然而起。負牆而立曰。弟子敢不承乎。

帝命不違。商頌長發之詩。引以證湯德之奉天無私也。天有四時。運行于上。地載神氣。動作于下。造化之理。至公無私。皆示人以效法。故曰無非教也。天有神氣。而言地載者。天施地生。在地成形可見也。神氣莫如風霆。皆自地出。風霆作而萬物甲者拆。蟄者啓。故曰流形庶物露生。此言天地無私也。聖人奉天無私。聰明睿智。氣志如神。外物之感。神明先覺。開發也。耆

欲物感也。卽四方有敗，必先知之意。如天將降時雨，山川先出雲，明炳幾先與天地同體，無私之至也。因引大雅嵩高之詩，徵天地山川聖人開先之義。詩本詠宣王言山靈降生賢佐，以開大平。卽文王武王奉天之德也。三代之王皆脩文德，令問洽天下。卽前云五至三無三無私爲民父母也。又引江漢之詩，徵之大王之德。猶哀公篇云大王之道也。蹶起貌，負牆問畢退而負壁立，以避來者也。

按記自哀公問以後，至中庸等篇，畧其度數，直譚道德性命，多舉孔子之言，而文辭不似論語簡約。然其

縱橫揮霍變動不羈旨趣亦沈冥懸解語下而上言
淺而深子云文莫吾猶人嗟乎其猶人而已乎

孔子閒居終

似二君矣

子云君子辭貴不辭賤辭富不辭貧則亂益亡故君子
與其使食浮於人也寧使人浮於食子云觴酒豆肉讓
而受惡民猶犯齒衽席之上讓而坐下民猶犯貴朝廷
之位讓而就賤民猶犯君詩云民之無良相怨一方受
爵不讓至於已斯亡子云君子貴人而賤已先人而後
已則民作讓故稱人之君曰君自稱其君曰寡君子云
利祿先死者而後生者則民不倍先亡者而後存者則
民可以託詩云先君之思以畜寡人以此坊民民猶倍
死而號平聲無告子云有國家者貴人而賤祿則民興讓

尚技而賤車則民興藝故君子約言小人先言子云上
酌民言則下天上施上不酌民言則犯也下不天上施
則亂也故君子信讓以涖百姓則民之報禮重詩云先
民有言詢于芻蕘子云善則稱人過則稱已則民不爭
善則稱人過則稱已則怨益亡詩云爾卜爾筮履無咎
言子云善則稱人過則稱已則民讓善詩云考卜惟王
度是錫京惟龜正之武王成之子云善則稱君過則稱
已則民作忠君陳曰爾有嘉謀嘉猷入告爾君于內女
乃順之于外曰此謀此猷惟我君之德於乎是惟良顯
哉子云善則稱親過則稱已則民作孝大誓曰予克紂

非予武惟朕文考無罪紂克予非朕文考有罪惟予小子無良

富貴人所難辭貧賤人所難處能處貧賤辭富貴則能讓而不爭矣浮猶過也讓美受惡讓上坐下讓貴就賤皆君子以身教民之事猶犯民猶不率教也臥席曰衽坐席曰席利祿先死謂先賞死難之臣亡謂流徙者存謂安居者不徙謂從上之教可以託謂民信厚可付託也偕死而號無告謂民風薄惡死相背棄老弱號哭無所控告也貴人賤祿貴賢才不吝爵祿也尚技賤車尚百工不重器物也興讓興藝上好

則下興不以言教也。約言謂先約後言。結其心而後告令也。先言謂不約而輕言。酌民言謂斟酌輿論。則上施而下奉之如天。不然民必犯上悖亂之道也。信讓乃所以酌民言也。民報禮重。所謂天其上也。引芻蕘之詩。徵酌民言之義。牧曰芻薪曰蕘。皆人之愚賤者。善稱人過。稱已信讓之道也。按此引爾卜與下引考卜二詩。皆不甚協。

子云君子弛其親之過而敬其美。論語曰三年無改於父之道可謂孝矣。高宗云三年其惟不言言乃謹。子云從命不忿。微諫不倦勞而不怨。可謂孝矣。詩云孝子不

匱子云睦於父母之黨可謂孝矣故君子因睦以合族
詩云此令兄弟綽綽有裕不令兄弟交相爲瘡子云於
父之執可以乘其車不可以衣其衣君子以廣孝也子
云小人皆能養其親君子不敬何以辨子云父子不同
位以厚敬也書云厥辟不辟忝厥祖子云父母在不稱
老言孝不言慈閨門之內戲而不歎君子以此坊民民
猶薄於孝而厚於慈子云長民者朝廷敬老則民作孝
子云祭祀之有尸也宗廟之有主也示民有事也脩宗
廟敬祀事教民追孝也以此坊民民猶忘其親

孝子於親有過則弛之勿求備有美則加敬焉愛之

至也。引論語記者之言。高宗語出周書。無逸篇。謹作
雍。謂言出人悅也。從命不忿。三者皆不得于親之事。
從命。謂命之難者。從之無忿戾之色。微諫。謂父母有
過。幾諫不匱。猶不竭。末言孝思之意。因睦合族。因燕
食之禮。合聚宗族。致親睦之情也。令兄弟善。兄弟也。
綽綽有裕。寬相容也。瘡病也。父之執。謂父同執業之。
友乘其車。不衣其衣。車所同衣。所獨也。卽前節君與
異姓同車。不同服之意。乘其車。服其衣。則并尊無異
矣。因父及父之友。故曰廣孝。父子不同位。謂坐不同
席。死不同昭穆。引古文商書大甲語。明子不同父位。

而上附于祖也。辟君也。言孝不言慈。事親不敢私其子也。戲而不歎。戲以娛親。不歎以傷親也。敬老。老近于親也。長民者。敬老于朝。則民興孝矣。示民有事。教民事死如生。事亡如存也。

子云。敬則用祭器。故君子不以非廢禮。不以美沒禮。故食禮。主人親饋。則客祭。主人不親饋。則客不祭。故君子苟無禮。雖美不食焉。易曰。東鄰殺牛。不如西鄰之禴祭。寔受其福。詩云。既醉以酒。既飽以德。以此示民。民猶爭利而忘義。子云。七日戒。三日齋。承一人焉。以爲尸。過之者。趨走以教敬也。醴酒在室。醕體酒在堂。澄酒在下。示

民不淫也尸飲三衆賓飲一示民有上下也因其酒肉聚其宗族以教民睦也故堂上觀乎室堂下觀乎上詩云禮儀卒度笑語卒獲子云賓禮每進以讓喪禮每加以遠浴於中雷飯於牖下小斂於戶內大斂於阼殯於客位祖於庭葬於墓所以示遠也殷人弔於壙周人弔於家示民不偯也子云死民之卒事也吾從周以此坊民諸侯猶有薨而不葬者子云升自客階受弔於賓位教民追孝也未沒喪不稱君示民不爭也故魯春秋記晉喪曰殺其君之子奚齊及其君卓以此坊民子猶有弑其父者

敬則用祭器。謂敬賓客。以祭器饗之。如邊豆、銅簋之類。惟敬不論物。不以菲廢禮。少之爲貴。以其內心也。不以美沒禮。多之爲貴。以其外心也。主人親饋敬客。客亦祭而食。以敬主人。君子有禮則食。無禮則不食。不論物之厚薄也。禘祭、薄祭。引易辭。明敬不在物也。民爭利忘義。惟其物耳。承一人謂奉一人。齊戒以奉。趨走以避敬之至也。過之者趨。卽曲禮謂爲君尸者。大夫士見之則下也。醴醕澄三酒。薄者在內。厚者在外。尤厚者在下。貴淡賤醲。示民不沈湎于味也。尸飲三。謂主人主婦賓客獻尸後。主人乃獻賓。故賓止飲。

一尊者飲多卑者飲少故曰示民上下因其酒肉謂因祭祀酒肉聚其宗族羣昭羣穆祭畢旅酬教民親睦也堂上觀室中之禮堂下觀堂上之禮引詩徵禮儀之善也卒度謂盡合法度卒獲謂盡得其宜賓自外入不可不讓每進以讓自門及階升堂皆三讓也喪自內出不得不遠每加以遠自中霤至墓漸遠也中霤謂室之中殷人弔於壙卽檀弓云殷既封而弔也周人弔于家反哭而弔也弔雖異不偯死同也故曰示民不偯人事至死而盡卒盡也宜于事盡時弔之從周從周人弔于家也蓋旣葬反而亡焉失之矣

是謂卒事也。薨而不葬，謂不備禮，非不窆也。春秋于諸侯薨，有不書葬者，孝子初喪，升由客階，不忍代父也。受弔于賓位，不忍爲主也。皆不忍亡親之意。故曰：示民追孝。諸侯在喪，稱子。已在君位而謙讓，故曰：示民不爭。魯僖公九年，晉獻公卒，冬里克弒其君之子奚齊，十年里克弒其君卓子。記者引以徵爭國不孝之罪。

子云：孝以事君，弟以事長，示民不貳也。故君子有君不謀仕，唯卜之日稱二君，喪父三年，喪君三年，示民不疑也。父母在，不敢有其身，不敢私其財，示民有上下也。故

天子四海之內無客禮莫敢爲主焉故君適其臣升自
阼階卽位於堂示民不敢有其室也父母在饋獻不及
車馬示民不敢專也以此坊民民猶忘其親而貳其君
子云禮之先幣帛也欲民之先惠而後祿也先財而後
禮則民利無辭而行情則民爭故君子於有饋者弗能
見則不視其饋易曰不耕穫不菑畲凶以此坊民民猶
貴祿而賤行子云君子不盡利以遺民詩云彼有遺秉
此有不斂穧劑伊寡婦之利故君子仕則不稼田則不
漁食時不力珍大夫不坐羊士不坐犬詩云采芣菲
無以下體德音莫違及爾同死以此坊民民猶忘義而

爭利以亡其身

以事父之禮事君。以事兄之禮事國之長上。則純心
不貳之臣矣。故君子既事其君。不敢更謀他仕。唯有
故而去。或當筮仕之初。卜以決疑。則稱二君。擇所事
也。不然則否。鄭以二爲儲貳鑒也。子之于父。至尊至
親。爲三年喪。人所不疑。君喪與父同者。使民知君父
同尊也。故曰示民不疑。父母在。不敢有其身。不敢私
其財。卽曲禮不許友以死。不有私財之義。示民有上
下。言卑統于尊也。父母在人。子雖貴。出入不敢用車
馬。爲陵尊也。曲禮三賜不及車馬。州閭稱其孝。無車

馬之饋獻可知。饋謂人饋已。獻謂已獻上。不敢專。謂親在爲主。子不敢專財也。民猶忘親而遺君。總結上四段之意。禮先幣帛。謂先行禮而後以帛幣將之。孟子云。恭敬者。幣之未將也。先禮後物。使民先敬事而後利祿也。苟先財後禮。則民惟知利。不辭讓而徑情直行。則民必爭。故君子於人有饋于已。不能出見其人。是不能行禮也。則于其人之饋。不敢視。況敢受乎。引易以徵無事而食不可也。不耕獲。謂不耕種而收穫也。墾田曰菑。田熟曰畚。不耕何可獲。不菑何可畚。所以爲凶也。遺秉不斂穧。皆謂禾之穫而未盡者。

束成把曰秉。鋪在地曰穢。寡婦之利謂使貧者取之也。仕則不稼以下五者皆不盡利之事。食時謂食四時之物不力珍。謂不力求珍羞也。不坐犬羊謂食其肉則不坐其皮。葑菲二菜下體根也。采其葉又取其根則盡利矣。德音莫違謂夫婦善言相順也。同死謂偕老也。

子云夫禮坊民所淫章民之別使民無嫌以爲民紀者也。故男女無媒不交無幣不相見恐男女之無別也。以此坊民民猶有自獻其身詩云伐柯如之何匪斧不克取妻如之何匪媒不得。蓺麻如之何橫從宗其畝取妻

如之何必告父母子云取妻不取同姓以厚別也故買
妾不知其姓則卜之以此坊民魯春秋猶去夫人之姓
曰吳其死曰孟子卒子云禮非祭男女不交爵以此坊
民陽侯猶殺繆穆侯而竊其夫人故大饗廢夫人之禮
子云寡婦之子不有見焉則弗友也君子以辟遠也故
朋友之交主人不在不有大故則不入其門以此坊民
民猶以色厚於德子云好德如好色諸侯不下漁色故
君子遠色以爲民紀故男女授受不親御婦人則進左
手姑姊妹女子子已嫁而反男子不與同席而坐寡婦
不夜哭婦人疾問之不問其疾以此坊民民猶淫泆而

亂於族子云昏禮壻親迎見於舅姑舅姑承予以授壻恐事之違也以此坊民婦猶有不至者

自獻其身謂女之奔者執麻種麻也橫從其畝橫直耕治也魯吳同姓魯昭公娶吳女爲夫人而諱其姓曰孟子事見春秋論語男女交爵謂男女相獻酬也陽侯繆侯其國未詳古兩君相見則主君與夫人同饗賓自有陽侯之禍此禮遂廢君子以辟遠以辟嫌故遠之也諸侯不下漁色不採求女色於民間也御婦人御車也婦人在車居左御者以左手前執轡面尙右避之也婦人有疾問之不可問其所疾避其隱

也壻親迎見舅姑見女父母也妻謂夫父母曰舅姑夫謂妻父母曰外舅姑承子授壻奉其女子授新壻恐其事或有違錯也婦猶不至謂壻親迎女有懷二心不肯行者如鄭丰之刺是也

按此篇記者本聖言而雜引經傳成文非盡夫子語也至其聯絡處不可分辨古人文章組織盡工得其意縱橫開闔皆是据所引論語春秋其非聖言易曉猶詩古序雜毛說鄭謂爲子夏與毛公合作類此

禮記通解卷十七終